

R
46
37

我們的工作十二週年紀念

滇緬辦事處

全體同志敬獻

重印續修建水縣志

卷一之一
子

民國癸酉冬重印

續修建水縣志

王垂書署


續修建水縣志

重印續脩建水縣志序

建水志乘創脩於有明清順治丁亥流寇之變兵燹後殘缺無全
書州牧李公瀕纂輯成帙時當草創固多缺略陳公肇奎踵而脩
之盡美矣未盡善也雍正辛亥刺史祝宏來守是邦集士紳而脩
之悉心搜羅採輯纂脩缺者補繁者刪誤者正條分縷晰勒爲成
書名曰建水州志後乾隆庚寅改州爲縣以至清朝鼎革蓋闕如
也迨民國戊午始續脩焉維時成濫竽分校每嘆相距二百餘年
之久朝代滄桑物換星移建水一邑幾經變故雖曰文獻名邦訪
已往之事蹟而老成彫謝莫由徵文而考獻至使昔之忠孝節義
勲業文章以及山林隱逸儒林文苑方技之可傳者不知湮沒幾

許其可徵求者僅得諸殘碑斷碣父老傳聞草野輿論於其所不知者如史之闕文也廣搜博採弗敢遺亦弗敢濫以期共信閱三載而告竣名曰續脩建水縣志脫稿時都人士爭先快觀惜所印少數今已罄盡而未得披覽者猶多生斯長斯而不知地方之風俗禮教先進之嘉言懿行山川疆域之沿革數典忘祖不惟後人無所觀感又何以備省志國史之採擇焉旅省同鄉有鑒於此會商籌貲重印幸得黃君毓沂之子珉認捐巨貲印州志貳百部縣志叁百部亦爲慷慨可風先是乃祖恩貢黃公汝霖嘗云異日修志予願採訪贊襄盡桑梓之義務而有志未逮卽下世矣孰意其子若孫之見義勇爲樂輸以成此美舉俾志乘廣爲流傳竟償乃

祖之素志洵可謂興宗矣可謂有志者事竟成也成雖善善從長
如有所譽者其有所試矣援筆叙之可爲後之急公好義者勸焉
民國癸酉小陽月邑人馬肇成叙於滇省客次



續修建水縣志序

民國七年余以第二衛戍區司令駐軍蒙自兼攝道篆適知建水縣事丁君鳳樓以續修縣志告余深韙之曾幾何時志稿竟成邦人士請余鑒定時余因和議赴滬未遑及此九年回滇任財政廳長公餘檢志稿展閱數四計起清雍正九年迄宣統末百八十年間事紀載詳明瞭如指掌而戎事一篇尤據事直書無鋪張無瞻徇與一家言者迥別洵爲一邑信史足以備省志國史之採擇矣建邑嚮附臨郡外接越南內屏省治爲吾滇南服重鎮自來文物之盛史不絕書固不待吾人之贅述惟是咸同回亂蹂躪徧三迤無城不破無堅不摧建城獨完全固守垂十餘年蓋梁總兵士美

之力也今僅紀其始末無一飾詞信史之徵已見一斑此外如戶口田賦之增改風俗學校之變遷靡不因時損益斟酌盡善則其他從可知已以五閱月最短之時期而成此百數十年最繁難之方志既詳且實非在事諸君子平日採擇商定相與有成之苦心與夫丁君鳳樓之提倡藍君熙菴之資助未易臻此是皆與斯志並傳者余以斯志之能紀實而爲一邑信史卽足以備省志國史之採擇也故樂爲之序

中華民國九年十月前雲南第二衛戍區司令官兼攝蒙自道尹
現任財政廳廳長昆明繆嘉壽謹序

續修建水縣志序

續志何由而作也已往之事先輩已志之矣後來之事先輩未之見也然先輩未見而吾人見之見之又安得不志之也乃建水舊志自雍正九年辛亥經前牧祝公臬衷纂輯成帙而後遂無有起而續之者距今百八十年其間人物勲業文章政教迭經變更今昔迥異若再聽其廢置不幾湮沒無傳乎民國六年五月樑奉宰是邦視事以來遍查城鄉見印山與煥峯對峙瀘水偕學海俱清靈秀所鍾足徵當代人材輩出一時科名之盛風俗之美彬彬爲諸邑冠昔人稱滇南鄒魯不誠然歟惟舊志殘缺歲久失修將欲使前之人物勲業文章政教俾後之人有所徵從何而徵之樑忝

知縣事責無旁貸於是集紳商議捐廉提倡又得藍紳和光助之
續志之議遂定卽於七年春開局採訪延梁紳家榮爲總纂高紳
仰賢劉紳光烈爲分纂並聚郡城博學之士公同討論悉心搜輯
乃操觚經始適值猛丁夷苗肇釁樛奉令出征未獲與諸君子刪
訂纂修越五閱月亂平歸來而書已脫稿取而閱之實獲我心是
書之成微特人物勲業文章政教足資考鏡其於忠孝節義名宦
鄉賢諸端記載尤詳以之正人心維大義有裨風化豈淺鮮哉嗟
呼以百餘年殘缺之遺帙今僅竭數月之精力而成之非賴諸君
子羣力贊勸曷克至此樛不意獲覩斯志之成若是之速也撫今
思昔不無感慨因應諸君子之請特述顛末於首以爲後之續志

者有所本云是爲序

署建水縣知事姚安丁國樑鳳樓撰

續修建水縣志稿序

章實齋曰今之所謂方志者非方志也其古雅者文人游戲小記
短書其鄙俚者文移案牘隨俗應酬嗟乎信如斯言則國史之修
不得假力於方志者有由來矣考周官行人獻五書太史陳風詩
知古者政教風俗之志載多胥於民間矧今日疆土文物之廣迥
非昔比吾鄉文化肇自炎漢响叮設縣載在班書山川之勝物產
之豐洵爲東南之雄鎮明清以來賢傑輩出勲業有廖王二軍門
政事氣節文學則有包司空傅都憲陳閣學他如蕭太史之卻金
琉球梁鎮軍之捍衛桑梓鄉里口耳之稱在在不衰斯文斯續顧
可無所表之者而志書之不修厥自雍正九年蓋百有餘歲以是

相延倘又百餘歲將勿令其口耳相稱者欲不漠然茫然得乎歲
丁巳鄉之君子皆慨然欲重修其書余息肩滬上聞而欣然樂助
之且作宦廿餘年念鄉愛鄉之心並歲月而共增驟聞斯舉既考
古者之治化復感章氏之卓言故亟欲與諸君子總其成焉戊午
春旋歸知撫英採華行將脫稿爰書數語用贅簡端

民國七年歲次戊午仲夏月廣東潮循道道尹郡人藍和光謹序

續修建水縣志稿芻言

人生不過百年耳由少而壯壯而老道德勲猷令人可歌可詠可驚可泣橫結於胸不忍磨滅者有幾哉卽降而求之志慮節操差堪表著者亦屬寥寥然當日苦心孤詣勿論品格高下不經端人正士秉筆直書僅於鄉曲里巷間稱揚盛事安望數傳之後罔有遺忘一遇時會變遷流風餘韻直同烟水蒼茫杳不知其所之矣邑之有志非最切要之事乎蓋志者識也識前人嘉言懿行以扶持道教鎮懾人心者也建志失修自雍正迄宣統幾二百年歷世既久纂述箴如數典貽譏吾輩讀書伊誰負咎將先正典型銷磨於無何有之鄉而欲取桑梓中之可爲坊表者鼓勵子弟從何實

指之曰某可法某可法彷彿爲人也哉昌本建人一念及此心滋戚焉數年來與二三君子太息長嘆急思有以成之也奈事無統紀有志未逮幸 國家辦理自治昌泰居縣議事會議長一提議之議會諸君皆樂贊成亦急思有以成之也隨舉昌佐田莘農直判魏星垣恩選楊錦文茂才後開辦此事商往蒙自箇舊籌貲與王著臣邦伯馬韶九孝廉藍孚亨直判束裝就道亦急思有以成之也癸丑春採訪局開矣分纂員聘矣捐金則有地方之富而好禮者矣代遠年湮訂期三載欲其廣採博收以免罣漏乃至丙辰變故多端四月旣望於焉中止時光易度轉瞬又年餘矣憶昔日邀約同志幾經籌商局始成立設年復一年竟不就緒採錄者未